

RAHSIA



DOKUMEN INI IALAH HAK MILIK KERAJAAN MALAYSIA

MINIT MESYUARAT

MESYUARAT
MENTERI BESAR DAN KETUA MENTERI
KE-147

7 OKTOBER 2025

BAHAGIAN KABINET, PERLEMBAGAAN DAN
PERHUBUNGAN ANTARA KERAJAAN,
JABATAN PERDANA MENTERI

RAHSIA

RAHSIA



DOKUMEN INI IALAH HAK MILIK KERAJAAN MALAYSIA

MINIT MESYUARAT

MESYUARAT
MENTERI BESAR DAN KETUA MENTERI
KE-147

7 OKTOBER 2025

BAHAGIAN KABINET, PERLEMBAGAAN DAN
PERHUBUNGAN ANTARA KERAJAAN,
JABATAN PERDANA MENTERI

RAHSIA



RAHSIA

**MINIT MESYUARAT
MENTERI BESAR DAN KETUA MENTERI KE-147
SELASA, 7 OKTOBER 2025**

KANDUNGAN

BIL.	PERKARA	MUKA SURAT
	SENARAI KEHADIRAN	1
I.	PERUTUSAN KHAS YAB PERDANA MENTERI	
(1)	Ucapan Alu-Aluan	11
(2)	Pre-Council Mesyuarat Majlis Raja-Raja Ke-265	11
(3)	Kedudukan Ekonomi Negara	16
(4)	Pembentangan Belanjawan 2026	17
(5)	Pelaksanaan Program BUDI MADANI RON95	18
(6)	Operasi Agensi Perisikan Mossad Israel di Singapura	19
II.	PENGESAHAN MINIT MESYUARAT	20
III.	PERKARA-PERKARA BERBANGKIT	
(1)	Laporan Prestasi Program/Projek Pembangunan Persekutuan Rolling Plan 5 Tahun 2025 Rancangan Malaysia Kedua Belas	20
IV.	TAKLIMAT KHAS	
(1)	BUDI MADANI RON95	21
(2)	Isu Keselamatan Negara	27

V. NOTA

(1)	Risiko Ancaman Perisik Israel Di Malaysia	31
(2)	Kesiapsiagaan Negara Menghadapi Monsun Timur Laut 2025/2026	32
(3)	Cadangan Pindaan Akta Orang Asli 1954 [Akta 134] Berkaitan Hal Ehwal Tanah	40
(4)	Pembanterasan Penyalahgunaan Dadah Dan Bahan Serta Perkhidmatan Rawatan Dan Pemulihan Dadah Dan Bahan Di Malaysia	45
(5)	Cadangan Pemantapan Proses Dan Prosedur Pengurusan Tanah Persekutuan	49
(6)	Strategi Penjenamaan Pelaburan Tunggal Di Bawah Inisiatif Transformasi Lembaga Pembangunan Pelaburan Malaysia (MIDA) Sebagai Pemacu Penggalakan Pelaburan Negara Melibatkan Kolaborasi Mampan Antara Kerajaan Persekutuan Dan Negeri	56

VI. HAL-HAL LAIN

(1)	Tunggakan Bayaran Kerajaan Persekutuan Kepada Kerajaan Negeri Perak	62
(2)	Cadangan Pembinaan Laluan Kereta Api Menghubungkan Automotive High Technology Valley Ke Laluan Kereta Api Utama Keretapi Tanah Melayu Berhad Di Tanjung Malim	65
(3)	Pengisytiharan Tapak Warisan Di Negeri Perak Sebagai Warisan Kebangsaan Di Bawah Akta Warisan Kebangsaan 2005 [Akta 645]	66

RAHSIA

- | | | |
|-----|--|----|
| (4) | Skim Penyuraian Trafik Bagi Projek Rapid Transit System (RTS Link) Di Bukit Chagar, Johor Bahru | 67 |
| (5) | Tunggakan Bayaran Kontraktor Bagi Projek Pembangunan Infrastruktur Luar Bandar: Jalan Luar Bandar | 69 |
| (6) | Permohonan Peruntukan Kewangan Bagi Tujuan Pengukuran Dan Pewartaan Kawasan Rizab Orang Asli Di Negeri Pahang | 71 |
| (7) | Penyelesaian Bayaran Premium Tanah Bagi Kelulusan Pemberimilikan Tanah Kerajaan Negeri Sembilan Untuk Pusat Latihan Gabungan Pasukan Tempur, Kem Syed Sirajuddin, Gemas, Negeri Sembilan | 72 |
| (8) | Pelaksanaan Notis Perubahan Bagi Projek Pembangunan Zon Perindustrian Fasa 5 Kulim Hi-Tech Park, Kedah | 73 |

VII. LAPORAN MAKLUM BALAS

- | | |
|---|----|
| Laporan Maklum Balas Ke Atas Keputusan-Keputusan Mesyuarat Menteri Besar Dan Ketua Menteri Ke-146 | 74 |
|---|----|

VIII. PENANGGUHAN MESYUARAT 75

RAHSIA

DOKUMEN INI IALAH HAK MILIK KERAJAAN MALAYSIA

BKPP.R.600-13/1/1 Jld. 23

**MINIT MESYUARAT MENTERI BESAR
DAN KETUA MENTERI KE-147**

Tarikh : Selasa, 7 Oktober 2025

Masa : 2.30 hingga 4.45 petang

Tempat : Bilik Mesyuarat Perdana,
Pejabat Perdana Menteri,
Aras 3, Blok Utama,
Bangunan Perdana Putra,
Putrajaya.

SENARAI KEHADIRAN

HADIR:

1. Yang Amat Berhormat Perdana Menteri
dan Menteri Kewangan,
(Dato' Seri Anwar bin Ibrahim)
– Pengerusi
2. Yang Amat Berhormat Timbalan Perdana Menteri dan Menteri
Kemajuan Desa dan Wilayah,
(Dato' Seri Dr. Ahmad Zahid
bin Hamidi)
3. Yang Amat Berhormat Timbalan Perdana Menteri dan Menteri
Peralihan Tenaga dan Transformasi Air,
(Dato' Sri Haji Fadillah bin Haji Yusof)
4. Yang Amat Berhormat Menteri Besar Terengganu,
(Dato' Seri Ir. Dr. Ahmad Samsuri
bin Mokhtar)

RAHSIA

RAHSIA

5. Yang Amat Berhormat Menteri Besar Negeri Sembilan,
(Dato' Seri Utama Haji Aminuddin bin Harun)
6. Yang Amat Berhormat Ketua Menteri Pulau Pinang,
(Tuan Chow Kon Yeow)
7. Yang Amat Berhormat Menteri Besar Pahang,
(Dato' Sri Diraja Haji Wan Rosdy bin Wan Ismail)
8. Yang Amat Berhormat Menteri Besar Selangor,
(Dato' Seri Amirudin bin Shari)
9. Yang Amat Berhormat Menteri Besar Kedah,
(Dato' Seri Haji Muhammad Sanusi bin Md Nor)
10. Yang Amat Berhormat Menteri Besar Perak,
(Dato' Seri Saarani bin Mohamad)
11. Yang Amat Berhormat Menteri Besar Johor,
(Dato' Onn Hafiz bin Ghazi)
12. Yang Amat Berhormat Menteri Besar Perlis,
(Tuan Mohd Shukri bin Ramli)
13. Yang Amat Berhormat Menteri Besar Kelantan,
(Dato' Haji Mohd Nassuruddin bin Haji Daud)
14. Yang Amat Berhormat Premier Sarawak,
(Diwakili oleh Datuk Amar Douglas Uggah Embas)
15. Yang Amat Berhormat Ketua Menteri Sabah,
(Diwakili oleh Datuk Ir. Shahelmey bin Yahya)
16. Yang Amat Berhormat Ketua Menteri Melaka,
(Diwakili oleh Datuk Rahmad bin Mariman)

RAHSIA

17. Yang Berbahagia **Ketua Setiausaha Negara,**
(Tan Sri Shamsul Azri bin Abu Bakar)

HADIR BERSAMA:

1. Yang Berhormat Menteri Pelaburan, Perdagangan dan Industri,
(Senator Tengku Datuk Seri Utama Zafrul bin Tengku Abdul Aziz)
2. Yang Berhormat Menteri di Jabatan Perdana Menteri (Undang-Undang dan Reformasi Institusi),
(Dato' Sri Azalina Othman Said)
3. Yang Berhormat Menteri di Jabatan Perdana Menteri (Hal Ehwal Agama),
(Senator Dato' Setia Dr. Haji Mohd Na'im bin Haji Mokhtar)
4. Yang Berhormat Menteri di Jabatan Perdana Menteri (Wilayah Persekutuan),
(Datuk Seri Dr. Zaliha Mustafa)
5. Yang Berhormat Menteri Perladangan dan Komoditi,
(Datuk Seri Johari bin Abdul Ghani)
6. Yang Berhormat Menteri Kewangan II,
(Senator Datuk Seri Amir Hamzah bin Azizan)

TIDAK HADIR (DENGAN MAAF):

1. Yang Amat Berhormat Premier Sarawak,
(Tan Sri Datuk Patinggi (Dr) Abang Haji Abdul Rahman Zohari bin Tun Datuk Abang Haji Openg)
2. Yang Amat Berhormat Ketua Menteri Sabah,
(Datuk Seri Panglima Haji Hajiji bin Haji Noor)

RAHSIA

3. Yang Amat Berhormat Ketua Menteri Melaka,
(Datuk Seri Utama Ab. Rauf bin Yusoh)
4. Yang Berhormat Menteri Dalam Negeri,
**(Senator Datuk Seri Saifuddin
Nasution bin Ismail)**
5. Yang Berhormat Menteri Pertahanan,
**(Dato' Seri Mohamed Khaled
bin Nordin)**

TURUT HADIR:

Setiausaha Kerajaan Negeri

1. Yang Berhormat Setiausaha Kerajaan Negeri Sabah,
**(Datuk Seri Panglima Sr. Haji Safar
bin Untong)**
2. Yang Berhormat Setiausaha Kerajaan Negeri Sarawak,
**(Datuk Amar Haji Mohamad Abu Bakar
bin Marzuki)**
3. Yang Berhormat Setiausaha Kerajaan Negeri Terengganu,
(Dato' Haji Zulkifli bin Ali)
4. Yang Berhormat Setiausaha Kerajaan Negeri Kedah,
(Dato' Seri Haji Norizan bin Khazali)
5. Yang Berhormat Setiausaha Kerajaan Negeri Kelantan,
**(Dato' Dr. Tengku Mohamed
Faziharudean bin Tengku Feissal)**
6. Yang Berhormat Setiausaha Kerajaan Negeri Perak,
(Dato' Ahmad Suaidi bin Abdul Rahim)
7. Yang Berhormat Setiausaha Kerajaan Negeri Sembilan,
(Dato' Mohd Zafir bin Ibrahim)
8. Yang Berhormat Setiausaha Kerajaan Negeri Johor,
**(Dato' Haji Asman Shah
bin Abd Rahman)**

RAHSIA

9. Yang Berhormat Setiausaha Kerajaan Negeri Perlis,
(Dato' Rahimi bin Ismail)
10. Yang Berhormat Setiausaha Kerajaan Negeri Pahang,
(Dato' Sri Nazri bin Abu Bakar)
11. Yang Berhormat Setiausaha Kerajaan Negeri Selangor,
**(Dato' Dr. Ahmad Fadzli
bin Ahmad Tajuddin)**
12. Yang Berhormat Setiausaha Kerajaan Negeri Melaka,
**(Diwakili oleh Datuk Wira Salhah
binti Salleh)**
13. Yang Berhormat Setiausaha Kerajaan Negeri Pulau
Pinang,
**(Diwakili oleh Tuan Mohamed
bin Abdul Rahman)**

Ketua Jabatan Persekutuan

1. Yang Berbahagia Peguam Negara,
(Tan Sri Mohd Dusuki bin Mokhtar)
2. Yang Berbahagia Ketua Setiausaha Perbendaharaan,
(Datuk Johan Mahmood Merican)
3. Yang Berbahagia Timbalan Ketua Setiausaha (Kabinet),
Jabatan Perdana Menteri,
(Datuk Dr. Farizah binti Ahmad)
4. Yang Berbahagia Ketua Setiausaha Sulit kepada
YAB Perdana Menteri,
(Dato' Shahrol Anuwar bin Sarman)
5. Yang Berbahagia Ketua Pengarah Perkhidmatan Awam,
(Diwakili oleh Dato' Mohd Shaiful bin Ibrahim)
6. Yang Berbahagia Setiausaha Persekutuan Sarawak,
(Dato Ahmad Nadzri bin Mohd Hassan)
7. Yang Berbahagia Setiausaha Persekutuan Sabah,
(Datuk Mohd Razali bin Wahab)

RAHSIA

SENARAI PEMBENTANG

Taklimat Daripada Menteri Kewangan – BUDI MADANI RON95

YB Senator Datuk Seri Amir Hamzah bin Azizan – Pembentang
Menteri Kewangan II
Kementerian Kewangan

Puan Wan Munirah Wan Mohamad
Ahli Pasukan RON95
Kementerian Kewangan

Taklimat Daripada Menteri Pertahanan – Isu Keselamatan Negara

YBhg. Datuk Lokman Hakim bin Ali
Ketua Setiausaha
Kementerian Pertahanan

YBhg. Leftenan Jeneral Dato' Azhan bin Haji Md Othman – Pembentang
Ketua Staf Markas Angkatan Tentera
Kementerian Pertahanan

Mejar Ahmad Syafiq Ikmar bin Haji Mohd Zulkipli
Pegawai Analisa Ketua Staf Markas Angkatan Tentera
Kementerian Pertahanan

**Nota Daripada Menteri Dalam Negeri Bil. N5/147/2025 – Risiko Ancaman
Perisik Israel Ke Atas Malaysia**

YDH CP Datuk Ibrahim bin Darus – Pembentang
Pengarah Cawangan Khas
Jabatan Cawangan Khas
Polis Diraja Malaysia

Encik Saefudin @ Mohd Fitri bin Haji Abdul Rahman
Superintenden Polis Cawangan Khas
Jabatan Cawangan Khas
Polis Diraja Malaysia

RAHSIA

Encik Muhammad Danial bin Idris
Inspektor Cawangan Khas
Jabatan Cawangan Khas
Polis Diraja Malaysia

Nota Daripada Perdana Menteri Bil. N2/147/2025 – Kesiapsiagaan Negara Menghadapi Monsun Timur Laut 2025/2026

YBhg. Datuk Abdul Halim bin Hamzah – Pembentang
Ketua Pengarah
Agensi Pengurusan Bencana Negara
Jabatan Perdana Menteri

Puan Siti Juhaida binti Johari
Penolong Pengarah Kanan
Seksyen Dasar dan Perancangan
Agensi Pengurusan Bencana Negara
Jabatan Perdana Menteri

Nota Daripada Menteri Kemajuan Desa Dan Wilayah Bil. N3/147/2025 – Cadangan Pindaan Akta Orang Asli 1954 [Akta 134] Berkaitan Hal Ehwal Tanah

Encik Saiful Zahlan bin Muhamad Azmi – Pembentang
Timbalan Ketua Pengarah (Perancangan dan Pengurusan)
Jabatan Kemajuan Orang Asli
Kementerian Kemajuan Desa dan Wilayah

Puan Nur Akmal binti Amernudin
Penolong Pegawai Tadbir
Bahagian Perancangan Strategik
Kementerian Kemajuan Desa dan Wilayah

Nota Daripada Menteri Dalam Negeri Bil. N4/147/2025 – Pembanterasan Penyalahgunaan Dadah Dan Bahan Serta Perkhidmatan Rawatan Dan Pemulihan Dadah Dan Bahan Di Malaysia

YBhg. Dato' Ruslin bin Jusoh – Pembentang
Ketua Pengarah
Agensi Antidadah Kebangsaan
Kementerian Dalam Negeri

RAHSIA

Encik Mohd Anuar bin Ismail
Ketua Penolong Pengarah
Agensi Antidadah Kebangsaan
Kementerian Dalam Negeri

Nota Daripada Menteri Sumber Asli Dan Kelestarian Alam Bil.
N6/147/2025 – Cadangan Pemantapan Proses Dan Prosedur
Pengurusan Tanah Persekutuan

YBhg. Datuk Muhammad Azmi bin Mohd Zain – Pembentang
Ketua Pengarah Tanah dan Galian Persekutuan
Jabatan Ketua Pengarah Tanah dan Galian Persekutuan
Kementerian Sumber Asli dan Kelestarian Alam

Puan Wan Arinie binti Mamat @ Wan Ahmad
Penolong Pengarah
Jabatan Ketua Pengarah Tanah dan Galian Persekutuan
Kementerian Sumber Asli dan Kelestarian Alam

Nota Daripada Menteri Pelaburan, Perdagangan Dan Industri Bil.
N7/147/2025 – Strategi Penjenamaan Pelaburan Tunggal Di Bawah
Inisiatif Transformasi Lembaga Pembangunan Pelaburan Malaysia
(MIDA) Sebagai Pemacu Penggalakan Pelaburan Negara Melibatkan
Kolaborasi Mampan Antara Kerajaan Persekutuan Dan Negeri

YBhg. Datuk Sikh Shamsul Ibrahim Sikh Abdul Majid – Pembentang
Ketua Pegawai Eksekutif
Lembaga Pembangunan Pelaburan Malaysia
Kementerian Pelaburan, Perdagangan dan Industri

Puan Reena Henrita Kanny
Timbalan Pengarah Kanan
Lembaga Pembangunan Pelaburan Malaysia
Kementerian Pelaburan, Perdagangan dan Industri

Puan Nurullydia Ahmad
Timbalan Pengarah
Lembaga Pembangunan Pelaburan Malaysia
Kementerian Pelaburan, Perdagangan dan Industri

URUS SETIA

1. Encik Mohamad Faisal bin Mohamad
Ketua Penolong Setiausaha (H)
2. Encik Muhammad Nasri bin Yahaya
Ketua Penolong Setiausaha (H)
3. Puan Nurulhazreen binti Shahidun Jamil
Penolong Setiausaha Kanan (H)
4. Encik Ahmad Farouq bin Ahmad Fuad
Penolong Setiausaha (H)

I. **PERUTUSAN KHAS YAB PERDANA MENTERI**

(1) **Ucapan Alu-Aluan**

YAB Perdana Menteri mengalu-alukan kehadiran YAB Menteri Besar, Ketua Menteri dan semua ahli mesyuarat serta wakil ke Mesyuarat Menteri Besar dan Ketua Menteri Ke-147.

Makluman

(2) **Pre-Council Mesyuarat Majlis Raja-Raja Ke-265**

1. YAB Perdana Menteri menarik perhatian kepada sesi *Pre-Council* Mesyuarat Majlis Raja-Raja Ke-265 di Istana Negara pada pagi hari ini (Selasa, 7 Oktober 2025) dan seterusnya memaklumkan serta memberi pandangan seperti yang berikut:

- (1) bahawa Yang Amat Berhormat telah menyembah penjelasan mengenai isu kehadiran Presiden Amerika Syarikat ke Sidang Kemuncak ASEAN Ke-47 di Kuala Lumpur pada 26 dan 27 Oktober 2025. Lazimnya Pengerusi ASEAN akan menjemput semua negara rakan dialog ASEAN termasuk Amerika Syarikat untuk menghadiri Sidang Kemuncak ASEAN, selaras dengan prinsip berkecuali dan berpusatkan ASEAN. Dalam hal ini, Malaysia selaku Pengerusi ASEAN 2025 tidak boleh membuat tindakan sendiri dengan membelakangkan prinsip berkenaan;
- (2) bahawa jemputan ke atas Presiden Amerika Syarikat tidak bermakna Malaysia akan mempertaruhkan pendirian teguh negara terhadap isu-isu antarabangsa

yang melibatkan Amerika Syarikat khususnya berkait dengan isu kemanusiaan di negara Palestin. Selain itu, kehadiran Presiden Amerika Syarikat juga perlu dinilai dalam konteks manfaat yang lebih besar kepada Malaysia dan ASEAN termasuk dalam memperkukuh hubungan diplomasi, perdagangan serta pelaburan dengan negara berkenaan;

- (3) bahawa Yang Amat Berhormat dijadual akan mengadakan sesi pertemuan empat mata dengan Presiden Amerika Syarikat pada sebelah petang 26 Oktober 2025, sebelum berlangsungnya Sidang Kemuncak Khas ASEAN – Amerika Syarikat. Pada sebelah malam, Makan Malam Gala Sidang Kemuncak ASEAN akan diadakan dengan kehadiran Presiden Amerika Syarikat serta pemimpin-pemimpin ASEAN. Presiden Amerika Syarikat dijadual berlepas untuk meneruskan lawatan ke Jepun pada pagi 27 Oktober 2025;
- (4) bahawa berhubung pelan damai Palestin-Israel, Yang Amat Berhormat menyembah maklum mengenai 3 pendirian utama Malaysia iaitu menggesa penamatan keganasan regim Zionis Israel di Palestin, khususnya di Gaza, menyokong bantuan kemanusiaan dan kesediaan Malaysia untuk menyertai pasukan pengaman antarabangsa bagi mendukung usaha pelan damai dan memastikan Israel menghormati pelan damai yang dimeterai, mengambil kira Israel sering melanggar persetujuan yang pernah dicapai sebelum ini;

- (5) bahawa Malaysia pada awalnya berpendirian untuk tidak memperakukan Deklarasi New York Mengenai Penyelesaian Secara Damai Isu Palestin dan Pelaksanaan Penyelesaian Dua Negara (Deklarasi New York), sebaliknya terus menegakkan pendirian berprinsip mengenai perjuangan rakyat Palestin. Pendirian ini menyebabkan negara-negara sahabat dan negara-negara sepemikiran telah mendesak dan merayu agar Malaysia mengubah pendirian dan memperakukan deklarasi berkenaan walaupun tidak bersetuju dengan sesetengah elemennya;
- (6) bahawa beberapa negara sekutu rapat Israel seperti Argentina dan negara-negara Kepulauan Pasifik berpendirian menolak Deklarasi New York. Mengambil kira perkara ini juga, Malaysia akhirnya mengubah pendirian mengundi menyokong Deklarasi New York sebagai tanda solidariti dengan aspirasi majoriti masyarakat antarabangsa yang menyokong penuh deklarasi berkenaan. Namun, Malaysia masih mengekalkan beberapa reservasi termasuk mempertahankan hak pembentukan sebuah negara Palestin yang merdeka dan berdaulat berdasarkan garis sempadan pra-1967;
- (7) bahawa berhubung Misi Bantuan Global Sumud Flotilla Ke Gaza, Palestin, Yang Amat Berhormat telah menyembah maklum bahawa kesemua 23 orang aktivis rakyat Malaysia yang ditahan oleh tentera Israel ketika menyertai misi tersebut telah dibebaskan dan dijangka tiba di tanah air pada malam ini. Usaha pembebasan

semua aktivis rakyat Malaysia ini merupakan hasil kerjasama erat serta hubungan diplomasi yang baik antara Malaysia dengan negara-negara berkaitan khususnya Turkiye, Qatar dan Amerika Syarikat. Kerajaan juga telah menghubungi Setiausaha Negara Amerika Syarikat, Marco Antonio Rubio dan Wakil Khas Presiden Amerika Syarikat, Steve Witkoff untuk mendesak Israel membenarkan Turkiye menghantar pesawat khas bagi membawa pulang kesemua aktivis dari Malaysia dan Turkiye yang terlibat;

- (8) bahawa Yang Amat Berhormat juga telah menyembah penjelasan bahawa Rang Undang-Undang (RUU) Pembaharuan Semula Bandar 2025 bertujuan untuk mengawal selia pembangunan semula bandar di Malaysia, memastikan bangunan lama dimodankan serta mewujudkan suasana perbandaran yang lebih mampan dan mesra rakyat terutama golongan berpendapatan rendah;
- (9) bahawa berhubung cadangan Kerajaan untuk meminda Akta Orang Asli 1954 [Akta 134] khususnya berkaitan hak tanah Orang Asli yang mana turut menyentuh bidang kuasa kerajaan negeri, pindaan akta tersebut belum dilaksanakan kerana masih perlu melalui beberapa proses yang ditetapkan termasuk libat urus bersama kerajaan negeri. Cadangan pindaan Akta 134 akan dibincangkan dalam Mesyuarat Menteri Besar dan Ketua Menteri pada hari ini, sebelum dibentangkan di Mesyuarat Majlis Tanah Negara; dan

- (10) bahawa tertakluk kepada persetujuan Mesyuarat Majlis Tanah Negara, RUU bagi meminda Akta 134 seterusnya akan diangkat untuk kelulusan Jemaah Menteri sebelum dibentangkan di Parlimen. Justeru, kerajaan negeri dimohon untuk meneliti cadangan pindaan Akta 134 bagi memastikan ia selaras dengan perundangan negeri, khususnya negeri-negeri yang mempunyai ramai penduduk masyarakat Orang Asli. Sebarang ulasan atau pandangan mengenainya sekiranya ada boleh dikemukakan kepada Kementerian Kemajuan Desa dan Wilayah untuk penelitian lanjut.

2. Mesyuarat:

(a) mengambil maklum:

- (i) akan keterangan YAB Timbalan Perdana Menteri dan Menteri Kemajuan Desa dan Wilayah bahawa sesi libat urus berhubung cadangan pindaan Akta 134 telah diadakan dengan kerajaan-kerajaan negeri, pihak berkuasa tempatan, pimpinan masyarakat Orang Asli, agensi Kerajaan berkaitan dan pihak-pihak berkepentingan. Hasil perbincangan tersebut, termasuk isu pemilikan dan pewartaan tanah adat akan dibentangkan dalam Mesyuarat Menteri Besar dan Ketua Menteri pada hari ini sebagai pemakluman awal dan seterusnya akan dibincangkan dengan lebih terperinci dalam Mesyuarat Majlis Tanah Negara yang akan datang;

- (ii) akan keterangan YAB Menteri Besar Perak bahawa penggubalan RUU Pembaharuan Semula Bandar 2025 tiada melibatkan sesi libat urus antara Kerajaan Persekutuan dengan kerajaan-kerajaan negeri. Sesi libat urus wajar diadakan dengan kerajaan-kerajaan negeri terlebih dahulu khususnya bagi RUU yang menyentuh bidang kuasa negeri; dan
- (b) bersetuju supaya Kementerian Kemajuan Desa dan Wilayah menyusul perkara di perenggan 1(10) dan 2(a).

Tindakan: Kementerian Kemajuan
Desa dan Wilayah

Perhatian: Semua Kerajaan Negeri

(3) Kedudukan Ekonomi Negara

YAB Perdana Menteri menarik perhatian terhadap kedudukan ekonomi Malaysia yang mencatatkan pertumbuhan sebanyak 4.4% pada separuh pertama tahun 2025. Prestasi ini antara lain, disokong oleh perbelanjaan domestik dan pelaburan yang berterusan. Yang Amat Berhormat seterusnya memaklumkan seperti yang berikut:

- (1) bahawa di sebalik ketidaktentuan ekonomi global, kadar pertumbuhan ekonomi negara berada dalam kedudukan yang lebih baik berbanding beberapa negara serantau. Jumlah eksport mencatatkan peningkatan sebanyak 1.9% kepada RM131.6 bilion, manakala jumlah pelaburan juga turut meningkat di

beberapa wilayah ekonomi, khususnya di Zon Ekonomi Khas Johor-Singapura (JS-SEZ). Bagi keseluruhan tahun 2025, Kerajaan yakin ekonomi negara akan terus berkembang dengan unjuran antara 4.0% hingga 4.8%; dan

- (2) bahawa berdasarkan perkembangan semasa, beberapa negara serantau seperti Indonesia, Thailand dan Filipina sedang berhadapan dengan situasi ketidakstabilan politik ekoran beberapa isu dalaman dan perubahan tampuk kepimpinan kerajaan. Hal ini sedikit sebanyak dibimbangi boleh menjejaskan kestabilan ekonomi serantau yang mungkin turut memberi kesan langsung terhadap perkembangan ekonomi Malaysia. Hal ini, akan dipantau dan diselarikan dengan tindakan intervensi oleh Kerajaan dari semasa ke semasa.

Makluman

(4) Pembentangan Belanjawan 2026

YAB Perdana Menteri memaklumkan bahawa Belanjawan 2026 sedang dalam peringkat akhir penyediaan. Ia telah dirangka dengan teliti dan seimbang berdasarkan keutamaan rakyat, cabaran ekonomi dan sejajar dengan Rancangan Malaysia Ke-13. Belanjawan 2026 akan dibentangkan di Dewan Rakyat pada Jumaat, 10 Oktober 2025 jam 4.00 petang.

Makluman

(5) Pelaksanaan Program BUDI MADANI RON95

1. YBhg. Pengerusi menarik perhatian terhadap pelaksanaan Program Subsidi Bersasar Petrol RON95 atau dikenali sebagai BUDI MADANI RON95 (BUDI95) yang telah bermula sepenuhnya pada 30 September 2025, dan seterusnya memaklumkan seperti yang berikut:

- (1) bahawa program BUDI95 merupakan salah satu langkah reformasi berani Kerajaan bagi memastikan subsidi petrol RON95 hanya dinikmati oleh rakyat Malaysia yang layak. Matlamat utama program ini adalah untuk memperkukuh kedudukan fiskal negara dan mengurangkan ketirisan subsidi, khususnya yang melibatkan penggunaan petrol RON95 bersubsidi oleh warga asing. Penjimatan perbelanjaan negara yang terhasil akan digunakan semula untuk meningkatkan kemudahan-kemudahan awam seperti pendidikan, kesihatan dan sebagainya; dan
- (2) bahawa Kerajaan sedia menimbangkan permohonan kuota tambahan subsidi petrol BUDI95 termasuk kepada pengusaha bot penumpang awam di Sabah, Sarawak dan Semenanjung. Kerajaan Negeri Sabah difahamkan telah mempunyai data dan maklumat yang lengkap mengenai pengusaha bot yang terlibat. Manakala Kerajaan Negeri Sarawak sedang menyediakan maklumat yang berkaitan. Hal ini akan diselaraskan oleh Kementerian Perdagangan Dalam Negeri dan Kos Sara Hidup melalui sistem Skim Kawalan Petrol Bersubsidi.

2. Mesyuarat bersetuju supaya Kementerian Perdagangan Dalam Negeri dan Kos Sara Hidup menyusul perkara di perenggan 1(2).

Tindakan: Kementerian
Perdagangan Dalam
Negeri dan Kos Sara
Hidup

Perhatian: Kementerian Kewangan

(6) Operasi Agensi Perisikan Mossad Israel Di Singapura

1. YAB Perdana Menteri memaklumkan bahawa berdasarkan maklumat yang diterima daripada agensi keselamatan negara, operasi agensi perisikan Mossad Israel yang berpangkalan di Singapura dilihat semakin berkembang sejak akhir-akhir ini. Perkembangan tersebut memberi gambaran bahawa agensi berkenaan sedang meningkatkan operasi risikan di rantau ini dengan tumpuan kepada Malaysia dan Indonesia sebagai sasaran utama. Ia antara lain, berkemungkinan daripada beberapa pendirian tegas Malaysia mengenai isu kezaliman rejim Zionis, Israel di negara Palestin. Sehingga kini, tiada bukti khusus yang boleh mengaitkan penglibatan secara langsung Kerajaan Singapura terhadap operasi Mossad di Malaysia. Namun, perkembangan ini agak membimbangkan dan perlu diberi perhatian oleh semua agensi keselamatan negara.

2. Mesyuarat bersetuju supaya Majlis Keselamatan Negara, Jabatan Perdana Menteri bersama Kementerian Pertahanan dan Kementerian Dalam Negeri menyusul perkara di perenggan 1.

Tindakan: Majlis Keselamatan
Negara, Jabatan Perdana
Menteri

Kementerian Pertahanan

Kementerian Dalam
Negeri

II. PENGESAHAN MINIT MESYUARAT

Minit Mesyuarat Menteri Besar dan Ketua Menteri Ke-146 pada 14 Julai 2025 disahkan.

III. PERKARA-PERKARA BERBANGKIT

Perkara-Perkara Berbangkit Daripada Minit Mesyuarat Menteri Besar dan Ketua Menteri Ke-146 Pada 14 Julai 2025

Nota

(1) Laporan Prestasi Program/Projek Pembangunan Persekutuan Rolling Plan 5 Tahun 2025 Rancangan Malaysia Kedua Belas

Mesyuarat mengambil maklum akan keterangan YAB Timbalan Perdana Menteri dan Menteri Peralihan Tenaga dan Transformasi Air bahawa Projek Takungan Air Pinggiran Sungai (TAPS) Jernih, Melaka sedang giat dilaksanakan dengan pemantauan rapi Kementerian Peralihan Tenaga dan Transformasi Air melalui Jabatan Bekalan Air bagi memastikan ia dapat disiapkan pada bulan Mac 2026. Pembangunan projek TAPS Jernih pada masa ini telah mendahului jadual (+3 hari) dan hampir mencapai 70% prestasi pelaksanaan.

Makluman

IV. TAKLIMAT KHAS

(1) BUDI MADANI RON95

Mesyuarat:

- (a) mengambil maklum akan taklimat oleh YB Menteri Kewangan II bertajuk "BUDI MADANI RON95" seperti slaid taklimat yang diedarkan antara lain, seperti yang berikut:
 - (1) bahawa pelaksanaan subsidi bersasar petrol RON95 atau BUDI MADANI RON95 (BUDI95) telah dimulakan sepenuhnya pada 30 September 2025. Program ini dilihat telah berjaya memberi manfaat besar kepada rakyat dengan petrol RON95 kini dijual pada harga RM1.99 seliter, lebih rendah berbanding harga sebenar RM2.60 seliter tanpa subsidi. Pelaksanaan Program BUDI95 antara lain, turut bertujuan menangani isu ketirisan subsidi khususnya melibatkan penggunaan petrol bersubsidi oleh warga asing dan aktiviti penyeludupan petrol ke negara-negara jiran;
 - (2) bahawa melalui Program BUDI95, kuota 300 liter akan diberikan secara automatik setiap bulan kepada warganegara Malaysia yang layak, iaitu pemegang MyKad berumur 16 tahun ke atas, serta memiliki lesen memandu yang aktif bagi kenderaan jenis kereta atau motosikal. Manakala pemandu pengangkutan penumpang (*e-hailing*) dan penghantaran barangan (*p-hailing*) yang layak boleh memohon kuota tambahan yang lebih tinggi melalui *fleet card* di bawah Skim Kawalan Petrol Bersubsidi (SKPS);

- (3) bahawa kaedah pemberian subsidi secara pukal yang dilaksanakan sebelum ini dilihat tidak efisien dan tidak mampan untuk jangka masa panjang kerana memberi beban kewangan yang tinggi kepada Kerajaan. Berdasarkan data yang direkodkan, jumlah jualan petrol RON95 telah meningkat kepada 18.1 bilion liter pada tahun 2024 berbanding 15.9 bilion liter pada tahun 2019. Peningkatan jualan ini secara tidak langsung telah meningkatkan jumlah tanggungan subsidi yang sangat ketara berjumlah RM18.4 bilion pada tahun 2024 berbanding hanya RM2.9 bilion pada tahun 2019;
- (4) bahawa perbandingan dengan negara-negara lain juga menunjukkan rakyat Malaysia pada masa ini menikmati harga petrol RON95 antara yang terendah di dunia. Malah, perbandingan harga petrol dengan negara-negara pengeluar minyak utama dunia seperti Arab Saudi juga menunjukkan harga jualan di negara berkenaan adalah pada kadar RM2.62 seliter. Manakala negara-negara serantau juga mencatatkan harga petrol RON95 yang lebih tinggi misalnya Singapura yang menetapkan harga pada kadar RM8.93 seliter, Thailand RM5.62 seliter dan Indonesia RM3.25 seliter;
- (5) bahawa penetapan harga dan kebenaran untuk membeli petrol RON95 adalah berdasarkan 4 kategori seperti yang berikut:
 - (a) warganegara Malaysia yang layak akan membeli pada harga RM1.99 seliter dengan kuota kelayakan 300 liter sebulan;

- (b) kenderaan awam dan komersial yang layak akan membeli pada harga RM2.05 seliter dengan kuota kelayakan yang akan ditentukan menggunakan *fleet card*;
 - (c) kenderaan awam dan komersial yang tidak layak dan bukan warganegara Malaysia akan membeli pada harga tanpa subsidi berdasarkan formula *Automatic Pricing Mechanism* (APM) iaitu RM2.60 seliter; dan
 - (d) kenderaan pendaftaran asing tidak dibenarkan mengisi petrol RON95;
- (6) bahawa buat masa ini Kerajaan masih mengekalkan dasar semasa untuk tidak membenarkan kenderaan pendaftaran asing membeli petrol RON95 walaupun kenderaan tersebut dimiliki oleh rakyat Malaysia. Namun, terdapat permintaan daripada pihak-pihak tertentu supaya dasar ini dipertimbangkan semula. Ini juga mengambil kira tekanan dan kekangan yang mungkin dihadapi oleh pengusaha stesen minyak di kawasan sempadan untuk menguatkuasakan larangan tersebut terhadap kenderaan pendaftaran asing. Hal ini perlu diteliti dengan berhati-hati;
- (7) bahawa pada masa ini, penetapan harga petrol RON95 tanpa subsidi adalah berdasarkan formula APM secara bulanan. Namun, ia akan diselaraskan semula dan berkemungkinan akan dilaksanakan secara mingguan seperti mana penetapan harga petrol RON97 dan diesel. Berdasarkan data taburan penggunaan bulanan,

purata penggunaan petrol RON95 dalam kalangan rakyat Malaysia adalah kurang daripada 100 liter sebulan. Dalam hal ini, penetapan kuota subsidi individu sebanyak 300 liter sebulan akan meliputi hampir 99.3% daripada keseluruhan pengguna dalam kalangan rakyat Malaysia;

- (8) bahawa rekod Jabatan Pengangkutan Jalan (JPJ) menunjukkan seramai 2.4 juta rakyat Malaysia tidak memperbaharui lesen memandu yang telah tamat tempoh. Justeru, pelaksanaan Program BUDI95 merupakan pendekatan serampang dua mata di mana selain dapat menyalurkan subsidi secara bersasar, ia juga akan menggalakkan rakyat untuk memperbaharui lesen memandu bagi menikmati kuota subsidi RON95. Ini juga secara tidak langsung menjana hasil kepada JPJ. Buat masa ini, kelonggaran masih diberikan kepada pemegang lesen memandu yang telah tamat tempoh (maksimum 3 tahun) untuk menikmati kuota subsidi RON95;
- (9) bahawa sehingga 6 Oktober 2025, jumlah keseluruhan transaksi yang direkodkan hampir mencapai 21.6 juta melibatkan kira-kira 9.6 juta rakyat Malaysia, dengan purata sekitar 3 juta transaksi sehari. Secara umumnya, sistem aplikasi subsidi RON95 dilihat mampu menampung jumlah transaksi yang besar melibatkan stesen-stesen minyak seluruh negara dengan lancar tanpa sebarang gangguan teknikal yang serius, dan dalam masa yang sama tidak menjejaskan keperluan pengguna;

- (10) bahawa berdasarkan tinjauan umum khususnya di platform media sosial pada 6 Oktober 2025, respons positif daripada rakyat telah meningkat kepada 47% berbanding hanya 37% semasa tinjauan awal yang dilaksanakan pada 29 September 2025. Peningkatan respons positif ini antara lain, adalah dipengaruhi oleh harga petrol RON95 yang lebih rendah seperti mana yang dijanjikan oleh Kerajaan, proses transaksi yang mudah di pam minyak, pengenaan harga sebenar tanpa subsidi kepada bukan warganegara Malaysia dan pengguna tidak perlu mendaftar melalui mana-mana sistem aplikasi untuk menikmati subsidi;
- (11) bahawa sebagai langkah penambahbaikan, Kementerian Kewangan akan terus memantau pelaksanaan Program BUDI95 dan menambahbaik aspek-aspek tertentu dari semasa ke semasa. Selain itu, pengemaskinian data juga akan dilaksanakan setiap minggu ke atas maklumat pembaharuan lesen memandu daripada sistem JPJ. Manakala, penetapan kuota tambahan bagi pemandu sepenuh masa *e-hailing* dan *p-hailing* juga akan dimuktamadkan sebelum 15 Oktober 2025 berdasarkan data daripada Agensi Pengangkutan Awam Darat;
- (12) bahawa Kementerian Kewangan pada masa ini juga sedang bekerjasama dengan Lembaga Kemajuan Ikan Malaysia (LKIM), pihak pelabuhan dan kerajaan negeri untuk mempergiatkan pendaftaran pemilik bot persendirian bagi membolehkan kuota tambahan disalurkan kepada mereka yang layak. Sebanyak

21,952 bot persendirian telah mendaftar dengan kira-kira 14,000 daripadanya didaftarkan di bawah LKIM dan baki 7,000 lagi di bawah Jabatan Pelaburan dan Dermaga Sabah. Kerajaan Negeri Sarawak juga sedang menggiatkan pendaftaran bot di negeri berkenaan sebelum maklumat mengenainya dikemukakan kepada Kementerian Kewangan; dan

- (13) bahawa bagi bot yang digunakan untuk tujuan perniagaan dan kenderaan jabatan/agensi Kerajaan, kuota petrol RON95 akan diberikan menggunakan *fleet card* berdasarkan SKPS. Selain itu, Kementerian Pengangkutan juga sedang membangunkan sistem pengumpulan data bagi mengenal pasti warganegara Malaysia yang tidak memiliki lesen memandu tempatan kerana menggunakan lesen memandu antarabangsa atau negara lain. Secara prinsipnya, golongan tersebut layak untuk menerima kuota subsidi yang ditetapkan tertakluk kepada penggunaan kenderaan pendaftaran tempatan milik sendiri semasa membeli petrol RON95;

(b) bersetuju:

- (i) supaya Kerajaan Negeri Sarawak menyusul perkara di perenggan (a)(12); dan
- (ii) supaya Kementerian Pengangkutan menyusul perkara di perenggan (a)(13).

Tindakan: Kementerian
Pengangkutan

Kerajaan Negeri Sarawak

(2) Isu Keselamatan Negara

Mesyuarat:

(a) mengambil maklum:

- (i) akan taklimat oleh YBhg. Leftenan Jeneral Dato' Azhan bin Haji Md Othman, Ketua Staf Markas Angkatan Tentera bertajuk "Isu Keselamatan Negara" (Slaid Taklimat Tidak Diedarkan) seperti yang berikut:
 - (1) bahawa isu keselamatan serantau merupakan antara isu utama yang perlu diberi perhatian oleh Kerajaan mengambil kira ia turut memberi kesan terhadap keselamatan dan kedaulatan negara. Antara isu keselamatan utama yang dihadapi oleh Malaysia pada masa ini adalah terkait dengan beberapa insiden yang berlaku di kawasan sempadan Malaysia-Thailand, selain isu pertikaian dan tuntutan persempadanan melibatkan beberapa buah negara di Laut China Selatan;
 - (2) bahawa secara umumnya, situasi di sempadan Malaysia-Thailand dilihat belum stabil sepenuhnya. Masih banyak insiden yang dilaporkan merangkumi kejadian pertempuran dan serangan bersenjata, letupan bom, penyeludupan dan sebagainya. Selain itu, ketidakstabilan di kawasan sempadan Malaysia-Thailand juga turut terkait dengan aktiviti

kumpulan pemisah tertentu dari negara berkenaan khususnya di beberapa wilayah Selatan Thailand;

- (3) bahawa pihak berkuasa Thailand pada masa ini sedang giat menjalankan operasi di kawasan sempadan Malaysia–Thailand bagi membendung aktiviti kumpulan pemisah yang dikenal pasti. Namun, pihak berkuasa Thailand dilihat sering mengaitkan aktiviti kumpulan pemisah dari negara berkenaan dengan Malaysia. Perkara ini sangat bercanggah dengan pendirian neutral Malaysia yang banyak membantu sebagai perantara dalam rundingan damai di Selatan Thailand;
- (4) bahawa tindakan pihak berkuasa Thailand yang sering mengaitkan Malaysia sebagai *safe haven* kumpulan pemisah tertentu dipercayai sebagai salah satu naratif untuk mengurangkan tekanan dalaman terhadap isu kawalan keselamatan di negara berkenaan. Namun, ia dibimbangi boleh menjejaskan hubungan dua hala kedua-dua negara. Malah, ia juga dikhuatiri turut menjejaskan usaha damai antara Kerajaan Thailand bersama kumpulan pemisah yang berkaitan;
- (5) bahawa isu pertikaian dan tuntutan beberapa buah negara di Laut China Selatan merupakan isu keselamatan serantau yang kritikal dan memberi

impak langsung kepada keselamatan serta kedaulatan negara. Republik Rakyat China (RRC) dilihat sangat agresif dan terus menerus menuntut wilayah di kawasan berkenaan berdasarkan peta *ten dashed-line*. Malah, RRC juga dilihat sering melakukan provokasi dengan mengatur gerak aset maritim di kawasan perairan Laut China Selatan;

- (6) bahawa ketegangan di Laut China Selatan turut melibatkan kuasa-kuasa besar seperti Amerika Syarikat dan Australia yang mempunyai kepentingan dalam kebebasan pelayaran dan keselamatan serantau. Dalam masa yang sama, tindakan Filipina memperkukuhkan kerjasama ketenteraan dengan kuasa-kuasa besar tersebut bagi mengimbangi kekuatan RRC di Laut China Selatan juga dibimbangi boleh mencetuskan serta menjejaskan kestabilan keselamatan serantau;
- (7) bahawa ekoran perkembangan ini, bahagian utara negeri Sabah yang terletak berhampiran sempadan maritim dengan Filipina merupakan kawasan yang paling terkesan dan terdedah dengan ancaman keselamatan. Malah, ketidakstabilan di kawasan perairan Laut China Selatan turut dibimbangi memberi kesan dari sudut ekonomi, termasuk yang melibatkan operasi eksplorasi sumber minyak dan gas oleh Petronas dan mewujudkan risiko operasi pelantar minyak yang telah dibangunkan; dan

- (8) bahawa pendekatan diplomatik yang berhati-hati serta kerjasama keselamatan yang lebih erat perlu terus diberi keutamaan bagi mengekalkan kestabilan serantau termasuk mengelakkan salah faham yang boleh menjejaskan hubungan dua hala. Kerjasama secara unilateral wajar terus diperkasakan. Dalam masa yang sama, keupayaan dan kekuatan ketenteraan negara juga perlu diperkukuhkan sebagai langkah penegasan Malaysia dalam mempertahankan kedaulatan negara di Laut China Selatan;
- (ii) akan pandangan YAB Perdana Menteri seperti yang berikut:
 - (1) bahawa tindakan Kerajaan Filipina yang memperkukuhkan kerjasama ketenteraan khususnya bersama Amerika Syarikat telah meningkatkan lagi ketegangan di Laut China Selatan. Situasi ini lebih membimbangkan kerana kawasan operasi kerjasama antara Filipina dan Amerika Syarikat serta kawasan tuntutan RRC berada sangat hampir dengan kawasan utara negeri Sabah;
 - (2) bahawa secara umumnya Kerajaan Filipina memberi jaminan kerjasama negara berkenaan bersama Amerika Syarikat bukan merupakan provokasi kepada Malaysia mahupun negeri Sabah. Namun, Kerajaan tetap memandang serius situasi ini dan telah mengarahkan supaya agensi keselamatan negara sentiasa

bersiapsiaga dan terus memantau perkembangan di Laut China Selatan; dan

- (b) bersetuju supaya Majlis Keselamatan Negara, Jabatan Perdana Menteri, Kementerian Pertahanan dan Kementerian Dalam Negeri menyusul pandangan di perenggan (a)(ii)(2).

Tindakan: Majlis Keselamatan
Negara, Jabatan Perdana
Menteri

Kementerian Pertahanan

Kementerian Dalam
Negeri

V. NOTA

(1) Risiko Ancaman Perisik Israel Di Malaysia

Mesyuarat:

- (a) mengambil maklum akan Nota daripada Menteri Dalam Negeri No. N5/147/2025 bertajuk "Risiko Ancaman Perisik Israel Di Malaysia" (Kertas dan Slaid Taklimat Tidak Diedarkan) dan taklimat yang berkaitan oleh YDH CP Datuk Ibrahim bin Darus, Pengarah Cawangan Khas, Polis Diraja Malaysia; dan
- (b) bersetuju supaya Majlis Keselamatan Negara, Jabatan Perdana Menteri, Kementerian Pertahanan dan Kementerian Dalam Negeri terus memantau dan mengambil tindakan sewajarnya terhadap aktiviti operasi agensi perisikan asing yang boleh mengancam keselamatan dan kedaulatan negara

RAHSIA

khususnya yang melibatkan operasi agensi perisikan Mossad Israel di Malaysia.

Tindakan: Majlis Keselamatan
Negara, Jabatan Perdana
Menteri

Kementerian Pertahanan

Kementerian Dalam
Negeri

(2) **Kesiapsiagaan Negara Menghadapi Monsun Timur Laut 2025/2026**

Mesyuarat:

(a) mengambil maklum:

(i) akan Nota daripada Perdana Menteri No. N2/147/2025 bertajuk "Kesiapsiagaan Negara Menghadapi Monsun Timur Laut 2025/2026";

(ii) akan taklimat oleh YBhg. Datuk Abdul Halim bin Hamzah, Ketua Pengarah Agensi Pengurusan Bencana Negara, Jabatan Perdana Menteri (NADMA JPM) seperti Nota dan slaid taklimat yang diedarkan antara lain, seperti yang berikut:

(1) bahawa NADMA JPM selaku Sekretariat Jawatankuasa Pengurusan Bencana Pusat (JPBP) sedang menyelaras persediaan menghadapi musim Monsun Timur Laut (MTL) melibatkan pelbagai agensi tindak balas termasuk

badan bukan Kerajaan (NGO) dan komuniti bagi memastikan kesiapsiagaan menghadapi sebarang kemungkinan bencana khususnya banjir. Bagi tujuan pemantauan dan amaran awal, Program Ramalan dan Amaran Banjir Negara (PRAB) yang dibangunkan oleh Jabatan Pengairan dan Saliran (JPS) kini beroperasi sepenuhnya di 33 buah lembangan sungai utama di seluruh negara;

- (2) bahawa PRAB berupaya meramal kejadian banjir lebih awal berdasarkan data ramalan cuaca yang dikeluarkan oleh Jabatan Meteorologi Malaysia (MET Malaysia) serta mengeluarkan amaran dan hebahan banjir monsun sekurang-kurangnya 2 hari lebih awal kepada agensi berkepentingan dan penduduk. Berdasarkan bacaan kitaran banjir besar 10 tahun, MET Malaysia menjangkakan akan terdapat kemungkinan berlakunya antara 5 hingga 7 episod luruan hujan lebat berterusan di sepanjang tempoh MTL pada tahun ini. Ramalan juga menjangkakan terdapat kemungkinan episod hujan lebat berterusan akan berlarutan sehingga bulan Mei 2026;
- (3) bahawa JPS juga telah melaksanakan pelbagai langkah kesiapsiagaan banjir termasuk penyelenggaraan sungai, kolam takungan banjir dan infrastruktur, pengaktifan Bilik Kawalan Operasi Pusat Ramalan dan Amaran Banjir Negara (PRABN), penempatan 280 pam bergerak

di seluruh negara, menaik taraf stesen siren amaran banjir dan kamera web, serta mengemas kini dan mengenal pasti 3,683 lokasi *hotspot* banjir. Selain itu, tindakan mitigasi awal seperti penyelenggaraan sistem perparitan dan pembalkan, selain memastikan 614 siren amaran banjir di sungai-sungai utama berfungsi dengan baik juga telah diambil;

- (4) bahawa NADMA JPM turut menyokong usaha Kerajaan dalam memperkukuh mitigasi dan adaptasi banjir seperti yang dinyatakan di bawah Rancangan Malaysia Ke-13 (RMK13) demi kesejahteraan rakyat dan kemampanan ekonomi negara. Tiga strategi utama akan dilaksanakan seperti yang berikut:
- (a) mempercepatkan pelaksanaan projek tebatan banjir melalui penambahbaikan perancangan, reka bentuk infrastruktur dan sistem saliran bersepadu berasaskan *Geographic Information System (GIS)*;
 - (b) menerapkan pendekatan inovatif seperti bangunan adaptif banjir, konsep *sponge city* serta bantuan kewangan dan insurans pasca banjir; dan
 - (c) memperkukuh tadbir urus melalui penyelarasan guna tanah, pelan pemulihan infrastruktur serta kerjasama erat dengan kerajaan negeri dan komuniti setempat;

- (5) bahawa dalam usaha memperkukuh mitigasi dan adaptasi banjir sepanjang tempoh RMK13, 5 sasaran utama telah ditetapkan untuk dicapai menjelang tahun 2030. Ini termasuk sasaran melindungi 1 juta penduduk daripada bencana banjir serta memperluas kawasan yang dilindungi sehingga 1,400 kilometer persegi. Selain itu, sebanyak 55 projek tebatan banjir baharu dirancang untuk disiapkan, bersama dengan pembinaan 4 kolam takungan dwifungsi sebagai langkah menampung limpahan air. Pembangunan 12 lembangan sungai bersepadu baharu juga akan dimulakan untuk meningkatkan kecekapan pengurusan air dan mengurangkan risiko banjir;
- (6) bahawa secara keseluruhannya, usaha-usaha yang telah dilaksanakan boleh dirumuskan seperti yang berikut:
- (a) mengemas kini dan mengenal pasti 3,683 lokasi *hotspot* banjir dengan tindakan mitigasi awal;
 - (b) seramai 82,780 anggota daripada Angkatan Tentera Malaysia, Polis Diraja Malaysia, Jabatan Bomba dan Penyelamat Malaysia, Angkatan Pertahanan Awam Malaysia dan Jabatan Sukarelawan Malaysia telah bersedia untuk diatur gerak ke kawasan-kawasan strategik;
 - (c) ketersediaan logistik dan aset jentera di mana 33,850 jentera telah digerakkan dan